



Broj: 03-04/1-04-24637/25
Sarajevo, 26.05.2025. godine

VLADA KANTONA SARAJEVO
Stručna služba Vlade Kantona Sarajevo

PREDMET: Izjašnjenje na zastupničku inicijativu zastupnice Admele Hodžić, dostavlja se –

VEZA: Akt Skupštine Kantona Sarajevo, broj: 01-04-55454-64/24 od 22.04.2025. godine

Na osnovu čl. 106. i 213. stav (1) Poslovnika Skupštine Kantona Sarajevo ("Službene novine Kantona Sarajevo", br. 41/12-Drugi novi prečišćeni tekst, 15/13, 47/13, 47/15, 48/16, 9/20, 14/20, 16/22, 17/22-Ispravka i 47/24), zastupnica Admela Hodžić podnijela je zastupničku inicijativu *"da se poduzmu sve aktivnosti kojim bi članovi Vlade (premijer i ministri) bili obavezni da prilikom zasnivanja radnog odnosa dostave Stručnoj službi za zajedničke poslove svu dokumentaciju koju dostavljaju i državni službenici (npr. lični dokumenti, izjave i ljekarsko uvjerenje)."*

S tim u vezi, Ministarstvo pravde i uprave dostavlja sljedeće izjašnjenje:

Uredbom o sadržaju, načinu vođenja i čuvanja personalnih dosijea zaposlenih u organima državne službe Kantona Sarajevo ("Službene novine Kantona Sarajevo", br. 28/21 i 12/25) (u daljem tekstu: Uredba) definisana je, između ostalog, dokumentacija koja se čuva u personalnim dosijeima zaposlenih u organima državne službe Kantona Sarajevo.

Pod zaposlenim, u smislu člana 1. stav (4) ove uredbe podrazumijevaju se državni službenici, namještenici, rukovodioci samostalne kantonalne uprave i samostalne kantonalne upravne organizacije, rukovodioci kantonalne uprave i kantonalne upravne organizacije koja se nalazi u sastavu kantonalnog ministarstva, savjetnici nosilaca funkcija, rukovodioci stručne i druge službe koju osniva Vlada Kantona Sarajevo, članovi Skupštine Kantona koji su u radnom odnosu, **članovi Vlade Kantona**, kantonalni pravobranilac i zamjenici kantonalnog pravobranioca.

U odjeljku A personalnih dosijea vode se dokumenti kojima se dokazuje ispunjavanje općih i posebnih uvjeta za rad na radnom mjestu na koje je zaposleni raspoređen na osnovu rješenja ili na osnovu akta o imenovanju za imenovana lica na mandatni period.

Između ostalog, u navedenom odjeljku personalnih dosijea zaposlenih vodi se i uvjerenje o radnoj sposobnosti (ljekarsko uvjerenje), kao dokaz da je zaposleni fizički i psihički sposoban za obavljanje poslova radnog mjesta na koje je raspoređen, potpisane izjave predviđene zakonom kojim se uređuju radni odnosi u Federaciji Bosne i Hercegovine ili drugim zakonom ili podzakonskim aktom, koje se potpisuju prilikom zasnivanja radnog odnosa i drugi lični dokumenti.

Iako Uredba u svom predmetu ne pravi razliku između članova Vlade i drugih lica obuhvaćenih pojmom zaposlenika, kada je u pitanju sadržaj personalnih dosijea, Ministarstvo pravde i uprave je nakon analize predmetne inicijative ocijenilo da bi bilo svrsishodno u članu 4. Uredbe precizirati dokumente koji se vode u personalnim dosijeima članova Vlade, imajući u vidu specifičnost njihovog položaja u odnosu na druga lica obuhvaćena pojmom zaposlenika.

Dopunama uredbe od obaveze ulaganja u personalne dosije članova Vlade izuzeli bi se dokumenti propisani članom 4. Uredbe koji su specifični za državne službenike ili namještenike (npr. dokazi kojima zaposleni potvrđuje ispunjavanje posebnih uvjeta predviđenih pravilnikom o unutrašnjoj organizaciji za rad na radnom mjestu na koje je raspoređen), dok bi se propisala obaveza ulaganja dokumenata koji su potrebni za regulisanje njihovog radno-pravnog statusa, kao i uvjerenja o radnoj sposobnosti (ljekarsko uvjerenje).

Ukoliko Vlada Kantona Sarajevo prihvati ovo izjašnjenje, Ministarstvo pravde i uprave će pristupiti pripremi Prijedloga Uredbe o dopuni Uredbe o sadržaju, načinu vođenja i čuvanja personalnih dosijea zaposlenih u organima državne službe Kantona Sarajevo kojim bi se uredila pitanja obuhvaćena predmetnom inicijativom.

S poštovanjem,

Dostaviti:

1. Naslovu;
2. a/a.

